

# Mahathir minta rakyat tegas tonjol identiti bangsa

MM 31 AUG 1980

KUALA LUMPUR 30 Ogos — Datuk Sri Dr. Mahathir Mohamad malam ini meminta rakyat supaya memupuk semangat tegas dan berani dalam menonjolkan identiti bangsa melalui kebudayaan tempatan dan program - program pembangunan negara.

Katanya, slogan "Bangsa Tegas" memberi penuh makna sekiranya setiap rakyat membuktikan ketegasan menghadapi masalah pemulihan dan pembangunan diri serta negara.

"Janganlah kita jadikan nilai-nilai asing sebagai ukuran kejayaan kita. Jangan menganggap kriteria asing terutama kriteria Barat semuanya bagus dan patut dicontohi sehingga wujud rasa rendah diri yang merugikan," kata Perdana Menteri dalam perutusan Hari Kebangsaan Ke-29 melalui RTM.

Beliau menasihati rakyat supaya tidak menjadikan kebebasan akhbar yang kononnya wujud di negara asing sebagai ukuran kepada media massa tempatan.

"Janganlah kebudayaan yang menimbulkan kegelisahan di negara asalnya dianggap moden di negara ini dan warna kulit serta penguatkuasaan sesuatu undang - undang dibeza-bezakan," katanya.

Datuk Sri Dr. Mahathir berkata ketegasan sesuatu bangsa dapat digambarkan melalui pelbagai aspek — ketegasan kerajaan dalam isu-isu antarabangsa dan membuat keputusan serta pelaksanaan, ketegasan institusi awam dan swasta

dalam urusan masing - masing dan ketegasan rakyat untuk menempa kemajuan dan kesejahteraan.

Katanya pendirian negara dalam isu aparteid, benua Antartika dan masalah Palestin adalah antara isu-isu mencerminkan ketegasan.

Perdana Menteri berkata sekiranya rakyat mengutamakan ketegasan bagi menempa sebuah negara yang teguh, maka tema Hari Kebangsaan "Bangsa Tegas Negara Teguh" seharusnya menggambarkan identiti bangsa.

Ketegasan pendirian terhadap diri sendiri, keluarga, masyarakat dan negara akan menggambarkan diri kita kuat atau lemah. Ia juga adalah lambang keku-

kuhan kita.

Datuk Sri Dr. Mahathir menegaskan bahawa kerajaan tidak mengubah pendiriannya terhadap dasar-dasarnya yang mendapat kritikan sinis dan tidak membina kerana yakin dasar-dasar itu bermanfaat dan perlu diteruskan.

"Ketegasan ini akhirnya mendapat sokongan majoriti rakyat. Jika kerajaan terawang - awang sama ada hendak meneruskan sesuatu dasar atau tidak, rakyat akan keliru dan hilang kepercayaan kepada kerajaan," katanya.

Perdana Menteri memberi jaminan bahawa kerajaan akan meneruskan

**LIHAT MUKA 11**

# Mahathir minta rakyat tegas

MM 31 AUG 1980

dasar-dasar yang memberi manfaat kepada negara setelah mendapat mandat baru daripada rakyat melalui pilihanraya umum baru-baru ini.

Bagaimanapun, katanya, ini tidak bermakna sesuatu dasar itu akan diteruskan selama-lamanya tanpa mengambil kira realiti semasa.

Kesediaan kerajaan membuat penyesuaian itu hendaklah juga dianggap satu ketegasan dalam mengatasi keadaan yang sudah berubah.

Katanya, ini kerana ketegasan tidak bermakna kerajaan perlu "rigid" atau berdegil dalam pendiriannya sehingga tidak memperdulikan keadaan yang telah berubah.

Perdana Menteri mahu sikap tegas ini turut diambil perhatian oleh semua agensi awam dan swasta.

Agensi-agensi awam yang diberi kuasa dan tugas di bawah pelbagai akta dan peraturan hendaklah menunjukkan ketegasan dalam melaksanakan kuasa-kuasa yang diberikan kepada mereka, katanya.

Bagaimanapun, Datuk Sri Dr. Mahathir mengingatkan bahawa dalam mempraktikkan ketegasan ini, perlu ada kebijaksanaan bagi memastikan sesuatu pendirian itu tidak semata-mata sikap degil yang tidak bermanfaat.

Beliau juga meminta rakyat supaya mengelakkan

diri dari dipengaruhi oleh orang-orang yang berkepentingan sendiri sehingga mereka membelakangkan perpaduan negara.

"Kita harus berpendirian tegas supaya kepentingan sesuatu kaum tidak mengatasi kepentingan negara," katanya.

Datuk Sri Dr. Mahathir menegaskan bahawa slogan-slogan seperti tema Hari Kebangsaan dan "Bersih, Cekap dan Amanah" boleh memandu negara ke arah pencapaian sesuatu matlamat.

Bagaimanapun sego- longan yang berkepentingan politik suka melihat negara gagal dalam matlamatnya, justeru itu mereka cuba menghilangkan kepercayaan rakyat kepada slogan-slogan dengan mencipta berbagai khabar angin terhadap niat kerajaan, katanya.

Mereka ini cuba membuktikan kerajaan atau pemimpin sendiri tidak mengamalkan slogan berkenaan, katanya.

"Hasrat mereka ialah supaya rakyat kecewa dan menolak panduan slogan berkenaan dan dengan itu gagallah usaha kerajaan dan mereka dapat menangguk di air keruh".

Perdana Menteri menegaskan bahawa jika rakyat ingin mendapat manfaat daripada slogan-slogan itu, mereka hendaklah sedar dan kenal perbuatan pihak-pihak tertentu ini dan menjauhi darinya.